

NOS HENDENAN SPECIAL

Drs. Ovidio Perez bek na Aruba:

"MI TA SINTI NA HOSPITAL HORACIO ODUBER MANERA NA CAS!"



Nos invitado di awe pa nos espacio "Nos Hendenan Special" ta drs. Ovidio Perez, Specialista den Anestesiologia, cu ta trahando na Hospital Horacio Oduber. Ovidio a nace na Venezuela pero na un edad hopi chiquito a bin Aruba cu su mayornan, y aki el a pasa su infancia sintiendo su mes un Arubiano.

E ta yiu di e recordado Ovidio Perez, di grato memoria, kende a traha cu Aruba Trading Co., y sra. Raquel de Perez, miembro di Sociedad Bolivariana, y empleada Consulado General di Venezuela.

Di cinco ruman e ta e unico cu a studia na Venezuela, y actualmente nan tur ta hunto atrobe na Aruba.

Ovidio ta casa cu Laura Soria, kende tambe ta docter, y nan tin dos yiu muher, Rebecca di 5 aa di edad y Andrea di apenas 4 luna.

ESTUDIO

Ovidio a pasa su enseñanza basico na Dominicus College, despues el a sigui pa Colegio Arubano unda el a cursa te 5de VWO. El a continua su estudio secundario na Venezuela, y despues a bay Universidad Central di Venezuela pa obtene su grado di Docter.

"Despues cu mi a gradua mi a haci dos aa di residencia na Isla di Margarita y seguidamente mi a bay Hospital General del Lidice, unda mi a gradua di Anestesiologo. Esaki a sosode na december di aa 1994".

Ovidio a keda traha na Venezuela pa un aa y durante e tempo ey a bin Aruba unda a ocupa e puesto di suplente di e dos Anestesiologo di Hospital.

"Awor aki mi ta trahando

den lugar di dr. Alders ken ta cabando su estudio na Hulanda y lo bin Aruba na October '97.

E posibilidad tey pa mi keda na Aruba, si e ritmo di operacion ta sigui crece manera tey awor aki".

PAKICO VENEZUELA Y NO HULANDA?

"E motibo principal ta pasobra mi a nace na Venezuela, y kedando mas cerca di Aruba y cu famia aya, mi por a keda mas cerca di mi mama aki na Aruba.

Tambe debi cu e posibilidad di haya beca tabata chiquito pa mi e tempo ey, pa motibo di mi nacionalidad Venezolano.

Y di tres pasobra mi tata a fayece tempo cu mi tabata na 4de VWO y mi kier a keda mas cerca mi famia na Aruba".

PAKICO A SCOGE ANESTESIOLOGIA?

"For di chiquito mi kier a bira docter, podise pa influencia di un ruman di mi wela cu tabata bisa cu lo mi bira un bon docter. Mi ta spera cu el a haya razon.

Pesey mi a bay Venezuela pa sigui e carera aki y na cuminzamento mi kier a bira docter di mucha. Na final mi a haya un gran amigo cu a invitami pasa na Intensive Care y eyan mi a dicidi cu ta Anestesiologo mi kier a bira.

E hecho cu bo por a mira e cambionan cu medicina ta haci riba e pacient ta un di e motibonan cu mas mi a gusta di bira Anestesiologo".

CON E TERENO DI ANESTESIOLOGIA A AVANZA?

"For di tempo cu nan tabata usa eter mas di 60 aa, pasa nos a pasa na droga hopi mas safe y facil di usa, cu tecnicanan y machinnan mas moderno cu ta permiti tene control di tur e signonan vital di e pacient, nos a avanza hopi.

Mayoria di biaha, Anestesia no ta un trance fastioso y di hopi riesgo manera den pasado. E presion arterial, e saturacion di sanger, y e CO2 cu e ta sali for di e pacient ora e hala rosea, ta permitinos controla tur posibilidad chiquito di complicacion prome cu e sosode. Awor aki nos por traha un diferencia entre anestesia completo, parcial y local. Akinan ta worde traha hopi cu Anestesia parcial, specialmente "Anestesia Spinal" unda e mitad abao di curpa di e pacient so ta drumi.

"Anestesia Spinal" ta worde hopi usa pa cesarea y procedimientos quirurgico y traumatologico di pia.

Normalmente ora ta un operacion largo den un posicion fastioso (p.e. di banda) of si ta hopi grandi, e ora ey ta usa anestesia general. Tambe si mester traha di lombrishi bay ariba (e.o. neck, torax, cabes, etc), of si ta mucha chiquito".

BO A SIGUI PRACTICA BO HULANDES NA VENEZUELA?

"Door cu na mi cas nos ta papia Spao cu mi mayornan y despues, como na Venezuela ta dificil pa haya hende pa papia Hulandes cu bo, mi Hulandes a bay hopi atras.

E prome dia di trabao na Aruba mi a bruha un "brankart" cu un "brankast". Naturalmente tur hende a hari. Awor aki nan tur ta haya cu mi Hulandes a bira hopi mehor.

Na Hospital practicamente bo mester papia tur idioma. Tin suplente di Hulanda cu mester worde papia Hulandes cune, tin suplente di Latino America cu bo mester papia of Ingles of Spao cune. Entre hendenan local logicamente nos ta papia Papiamentu".

CON BO TA HAYA E OPLEIDING DI MEDICINA NA VENEZUELA?

"Personalmente mi ta haya cu e nivel di bo educacion den cierto rango bo ta hacie riba bo mes. Ora mi a cuminza e nivel tabata worde considera como hopi halto pa Latino America. E condicionnan economico awor aki ta pone cu hopi hospital ta cerando nan opleiding pasobra e ta sali hopi costoso, of no tin e posibilidad di wak basta pacient cu por permiti pa bo haya un opleiding adecua.

E hospitalnan "grandi" ainda ta dunando un bon educacion.

Tocante e practica cu e pacient for di e dos aa di opleiding caba bo ta tuma contacto directo cu e pacient loke ta estimulabo hopi pa studia y repasa bo teoria constantemente, lo cual mi ta haya ta hopi positivo".

BO KIER KEDA NA ARUBA?

"Ainda mi no sa cual banda di mi ta Arubiano y cual ta Venezolano. Pero mi ta sigur cu lo mi gusta keda na Aruba y eherce aki mi profesion.

Aki mi tin mas tempo pa mi famia mientras cu na Vene-

zuela mi ta perde dos ora den trafico tur dia ya cu mi tin cu move casi di un banda pa otro di Caracas. Ademas di e trafico dificil tin e aspecto di inseguridad, cu no ta bay drecha pa awor.

Tambe debi cu mi tin dos yiu y lo ta un bentaha si nan por sia varios idioma, y tin e infancia cu mi tabata tin cual mi a goza di dje masha hopi".

CON BO SINTI BO MES NA HOSPITAL?

"Apesar cu e forma di traha ta otro encuanto organizacion cu na Venezuela, mi a worde ricibi cu hopi calor na Hospital Horacio Oduber. Mi ta sinti mi mes hopi na cas, apesar di oranan largo di trabao.

Mi ta haya cu e ta un hospital bon dota pa e necesidadnan di Aruba teniendo cuenta cu e grandura di e Isla, y mi ta sinti cu e lo ta un bon oportunidad pa mi, si mi por keda trahando akinan.

Mi tin un par di bon colega cu semper ta apoyami den tur cos y e asistentenan cu ta traha na Operatie Kamer tambe ta un respaldo grandi pa mi".